

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 22. Dezember 2021

Här President,

esou wéi d'Chambersreglement et virgesäit, bieden ech lech, dës parlamentaresch Fro un d'Madamm Gesondheitsminister weiderzeleeden.

Säit dem Ufank vun der COVID-Kris ass d'Iwwerlaaschtung vum Gesondheits- a Fleegepersonal zu engem vun den entscheidende Krittäre fir politesch Agrëffer an d'Ekonomie an, an d'Privatliewe vun de Leit an engem nach ni gekanntem Ausmooss avancéiert, ouni awer, datt fir dës Iwwerlaaschtung jee e konkrete, statisteschen Indicateur definéiert a matgedeelt gi wier.

An deem Zesammenhang géif ech der Madamm Gesondheitsminister gär dës Froe stellen:

- 1) Wéi hunn sech déi absolut Zuele vun de fräiberufflechen Dokteren, den ugestallten Dokteren souwéi den Infirmiëren am Gesondheits- a Fleegepersonal zu Lëtzebuerg während de Joren 1990 bis 2020 entwéckelt?
- 2) Kann d'Madamm Minister eng Tabell presentéieren, déi regruppéiert, wéi sech d'Zuel vun den Awunner, d'Zuel vun de Leit mat enger lëtzebuergescher Matricule, d'Zuele vun de fräiberufflechen Dokteren, den ugestallten Dokteren souwéi den Infirmiëren am Gesondheits- a Fleegepersonal während de Joren 1990 bis 2020 entwéckelt hunn, a wéi vill Awunner a Leit mat enger lëtzebuergescher Matricule sech jeeeweils op een Dokter (cumuléiert) an eng Infirmière aus dem Gesondheitsberäich verdeelt hunn?
- 3) Kann d'Madamm Minister eng Tabell presentéieren, déi regruppéiert, wéi sech d'Gesamtzuel vun den Awunner vun Alters- a Fleegeheemer, souwéi Leit déi en allgemenge Fleegeedéngscht an Usproch huele während de Joren 1990 bis 2020 entwéckelt huet, a wéi vill vun deene genannte Persounen sech jeeeweils op eng Infirmière verdeelt hunn? Kann d'Madamm Minister fir dee genannten Zäitraum w.e.g de järelechen Duerchschnittsalter vun der Bevëlkerung preziséieren?
- 4) Kann d'Madamm Minister eng Tabell presentéieren, déi regruppéiert, wéi vill Iwwerstonnen déi ugestallten Dokteren, an d'Infirmiëren aus dem Gesondheits- a Fleegesecteur während de Joren 1990 bis 2020 jeeeweils insgesamt gelescht hunn a wéi dës Iwwerstonnen sech zum engen op déi eenzel Personalgruppe verdeelen a wéi vill Iwwerstonnen domat jeeeweils duerchschnëttlech op ee Verrieder vun deenen eenzele Personalgruppen entfall sinn? Kann d'Regierung preziséieren op wéi eng dräi Méint de Pic vun de geleschten Iwwerstonnen während deene genannte Jore jeeeweils entfall ass an op wéi eng dräi Méint de Pic vun der Kompensatioun vun de geleschten Iwwerstonne während deene genannte Jore jeeeweils entfall ass?

- 5) Kann d'Madamm Minister eng Tabell presentéieren, déi regruppéiert, wéi vill Stonne Krankeschäin während de Joren 1990 bis 2020 jeeweils op d'Personal aus dem Gesondheets- a Fleegesecteur entfall sinn a wéi vill Stonne Krankeschäin dëst jeeweils am Duerchschnëtt pro Persoun pro genannter Berufsgrupp entsprach huet?
- 6) Kann d'Madamm Minister eng Tabell presentéieren, déi regruppéiert, wéi vill Aarbechtsstonnen un zweckgebonnenem Congé (zum Beispill den Eltercongé) während de Joren 1990 bis 2020 jeeweils op d'Personal aus dem Gesondheets- a Fleegesecteur entfall sinn a wéi vill Stonne Congé dëst jeeweils am Duerchschnëtt pro Persoun pro genannter Berufsgrupp entsprach huet?
- 7) Kann d'Madamm Minister eng Tabell presentéieren, déi regruppéiert, wéi vill Aarbechtsstonnen am Gesondheets- a Fleegesecteur am Joer 2020 spezifesch op d'Ëmsetzung vu COVID-Veruerdunge vun der Regierung entfall sinn, dëst souwuel "um Terrain" wéi och um Niveau vun der administrativer Kontroll?

Mat déiwem Respekt,



Jeff Engelen
Deputéierten